

Tun Mahathir ajak rakyat usaha lebih gigih capai status negara maju
Astro Awani
1 Januari 2019
Afiezy Azaman,

PUTRAJAYA: Perdana Menteri Tun Dr Mahathir Mohamad menyeru rakyat Malaysia untuk berusaha mencorak masa depan negara demi mencapai status negara maju pada tahun 2025.

Justeru, beliau mengajak seluruh segenap lapisan masyarakat berusaha dengan lebih gigih pada tahun 2019 untuk membangunkan negara.

"Saya yakin bahawa hari ini akan bawa banyak nikmat kepada kita, kita akan sambut tahun ini dengan hati yang senang dan gembira serta saya yakin kita semua akan bekerjasama untuk bangunkan negara bertuah ini.

"Ini adalah negara kita bersama, terpulang kepada kita untuk corakkan negara kita. Sebenarnya kita bernasib baik kerana negara kita ini aman. Kita perlu berusaha dengan lebih gigih pada tahun 2019.

"Inilah harapan kita semua, dan sekejap lagi kita akan sampai tahun 2019 dan sebelum itu saya ingin ucap 'selamat sambut tahun baru' dengan gembira kerana kita berjuang untuk hidup di negara," katanya ketika berucap pada ambang Sambutan Tahun 2019 di Dataran Putrajaya, pada malam Isnin.

Pada majlis itu, kira-kira 1 juta orang hadir bagi menyaksikan Festival Lampu 2018 dan bersama-sama melakukan kiraan bagi menyambut tahun 2019.

Ia turut dihadiri isteri perdana menteri Tun Dr Siti Hasmah Mohd Ali; Menteri Pendidikan Maszlee Malek; Menteri Pembangunan Usahawan Datuk Seri Mohd Redzuan Md Yusof; Menteri Wilayah Persekutuan Khalid Samad; Menteri Pelancongan, Kesenian dan Kebudayaan Datuk Mohammadin Ketapi; dan Presiden Perbadanan Putrajaya Datuk Dr Aminuddin Hassim.

Festival yang memasuki tahun keenam dengan tema 'Warna-warni Putrajaya' itu menyajikan pertunjukan bunga api secara langsung dan juga bunga bercahaya 3D.

Festival yang bermula sejak 28 Disember lalu turut dimuatkan dengan pelbagai program sampingan seperti E-Games, wayang kulit, beca Putrajaya serta persembahan jalanan.

© 2019 Astro Awani Network Sdn. Bhd.
(535275-D) All Rights Reserved.

Source: <http://www.astroawani.com/berita-malaysia/tun-mahathir-ajak-rakyat-usaha-lebih-gigih-capai-status-negara-maju-194858>